

Ullormut oqaluuserisassanut nassuiaat.

(Inatsisartut Siulittaasoqarfiat)

Folketingimi ammaanersiornermut peqataanertik pissutigalugu Inatsisartut Siulittaasuat aamma Naalakkersuisut Siulittaasuat ataatsimiinnermi peqataanngillat.

Inatsisartunut ilaasortat Hans Enoksen, Siumut aamma Juliane Henningsen, Inuit Ataqatigiit ulluni 5. oktober - 12. oktober taasisarnermut isumaqatigiissuteqarput.

Kiisalu Inatsisartunut ilaasortat Kristian Jeremiassen, Siumut aamma Inatsisartut Siulittaasuat, Josef Motzfeldt, Inuit Ataqatigiit ulluni 5. oktober - 8. oktober taasisarnermut isumaqatigiissuteqarput.

Siunnersuut pillugu tusarniaanermi akissutit suli utaqqineqarnerat pissutigalugu immikkoortoq 90, Meeqqanik pinerliisimannginnermut uppersaatinik piunarsaatitaaneq pillugu Inatsisartut inatsisissaattut siunnersuut, Naalakkersuisut tunuartippaat Naalakkersuisullu maanna naatsorsuutigaat UPA 2010-mi saqqummiunneqassasoq.

Immikkoortoq 14, Nunanut allanut tunngasutigut naalakkersuinikkut ingerlatsineq pillugu nassuiaat, ulloq 25. november 2009-mi oqaluuserisassanngortinneqarpoq.

Immikkoortoq 124, Aalisakkat akitsuutaat pillugu inatsisissatut siunnersuut. Immikkoortup siullermeerneqarnissaa ulloq 16/10-imut nuunneqarpoq aammalu aappassaaneerneqarnissaa ulloq 11/11-mut nuunneqarluni ullorlu 18/11 pingajussaaniigassanngortinneqarluni.

Immikkoortoq 86, Qitornavissartaartarneq pillugu inatsisip allanngortinneqarnera pillugu inatsisip Kalaallit Nunaannut atuutilersinneqarnera pillugu peqqussutit kiisalu meeqqat illersorneqarnerat pillugu aamma nunani tamani qitornavissartaartarnerit eqqarsaatigalugit suleqatigiinneq pillugu Haagimi nunat tamalaat isumaqatigiissutaata 29. maj 1993-imeersup atuutilersinneqarnerata Kalaallit Nunaanni Namminersorlutik Oqartussanit akuerineqarnissaanik aalajangiiffigisassatut siunnersuut, Naalakkersuisut sinnerlugit Isumaginninnermut Naalakkersuisumit saqqummiunneqassaaq.

Immikkoortoq 104, Qimmit qimuttut qimmeqarneq qitsuuteqarnerlu pillugit Inatsisartut inatsisaannit nr. 18, 30. oktober 1998-imeersumit avissaartillugit immikkut inatsisiliunneqarnissaat pillugu Naalakkersuisut suliaqaqqullugit peqquneqarnissaannik siunnersuut, siunnersuuteqartumit tunuartinneqarpoq.

Immikkoortoq 95, Aalisarneq pillugu Inatsisartut inatsisaat nr. 18, 31. oktober 1996-imeersumut kingornatigut allannguuteqartinneqarsimasumut allannguutissatut siunnersuut, maanna ulloq 23. oktober siullermeerneqassaaq, 20. november aappassaaneerneqassalluni ullorlu 27. november 2009 pingajussaaneerneqassalluni.

Inatsisartunut ilaasortap Doris Jakobsenip ulloq 5. oktoberimit 12. november 2009 ilanngullugu sulinngiffeqarnissaa akuerineqarpoq, taamaattumillu sinniisussaanik aggersaanissaq Siulittaasoqarfimmit akuerineqarpoq.

Qinigaanerup Misilinneqarnissaanut Ataatsimiititaliap Siumup sinniisussaata Bitten Høegh-Damip qinikkatut atuussinnaanera akuersissutigaa.

Bitten Høegh-Dam aqagumit Inatsisartut ataatsimiinnerani peqataalissaaq.